

EXERCITATIO HISTORICO POLITICA
DE

REPVBLICA AN- TIQVA VETERVM GERMANORVM

QVAM CVM ALIVNDE

Tum præcipue ex discursibus
*VIRI NOBILISSIMI, AMPLISSIMI
ET CLARISSIMI*

HERMANNI CONRINGII

Philosophiæ ac Medicinæ Doct̃oris, hujusq; &
Politices in Acad. Iuliâ Professoris Celeberrimi, S. R.

Majest. Sueciæ, & Illustriſſimi Ostfrisiæ Comit̃is Con-
siliarij intimi & Archiatri &c. Dn. Præceptoris & Pro-
motoris sui ætatem venerandi,

conciinnaram

FAVENTE DEO

Eodem moderatore

Placið ventilationi subijciet

NICOLAUS MARTINI

SLESVIC: HOLSATVS.

IN NOVI IVLEI AVDITORIO MAIORI

Ad diem Aprilis.

— 05)0) —

HELMESTADII,

Typis HENNINGI MULLERI Acad. Typ.

Anno c15 15 c LIV.



RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

THESIS I.

Qui alicujus Reip. formam & constitutionem accurate pernoscere, in ejusque cognitionem & naturam altius descendere gestiunt, illi etiam ante omnia, scopum, quem illa sibi Resp. propositum habet, inquirere & investigare debent. Non autem existimandum est, quasi idem omnibus Rerump. formis attendatur, aut quasi non alij atque alij dari possint aut dentur scopi; & sane evenire posse putamus, ut Resp. aliquæ in forma conveniant, quæ tamen, quod scopum quidem attinet, longe sint diversissimæ, & contra, quæ in administrationis forma longe à se invicem dissident, eundem scopum respiciant, & ita hac quidem in parte conveniant.

II. Potest autem scopus iste, (nostra quidem sententia) in duplici differentia constitui, alius enim est, qui dominantibus, alius, qui toti Reip. intenditur. Quam dominantes respiciunt, magis ad privata ipsorummet commoda inclinât & ejusmodi scopus seu finis in Tyrannide est, τὸ τῷ μοναρχῶντος συμφέρον, in Oligarchia τῶν ὀλιγαρχούντων, in democrazia τὸ δῆμος, quæ voce nonnunquam totus populus, nonnunquam vero infima minutæ plebis fæx intelligitur. Hunc autem finem seu scopum, qui formas Rerump. à se invicem distinguit, locum hic habere minime posse putandum est. Alius est, qui toti alicui Reip. intenditur, & ipse est quem nos hic quærimus, hunc ergo accuratius aliquanto intueamur, quoniam nostro instituto illum conducere arbitramur.

III. Constat autem ex Ethicis, quatuor potissimum

genera institutorum humanorum recenseri, in quibus hominum industria plerumque versari & occupari soleat. Aut enim homines, quibus, (uti Poëta ait)

De meliore luto fixis præcordia Titans

Ita vitam suam & actiones instituunt, ut veram virtutem, eamque quoad licet, perfectam consequantur; aut hac relicta, in potentia & gloria bellica studium omne collocent, armorumque vi nominis sui famam extendere, & finitimis dominari satagant. Nonnulli porro non tam rerum potiri, quam ad magnas emergere opes (uti Lucretius ait) allaborant, ideoque divitijs congerendis dies noctesque invigilare non abhorrent, huc denique omnem mentis ac cogitationum aciem intendunt ut, quod reliqui virtuti & potentiæ bellicæ, illi acquirendo & augendo censui tempus transcribant. Nec desunt porro, qui spretis hisce omnibus, soli voluptati sese indulgent, & tantum non mancipant, qui omnem humanæ vitæ beatitudinem & felicitatem, solo ventre cui natura obœdientes eos finxit, metiuntur. Neque vero hoc de singulis tantum hominibus sed integra potius aliqua gente, & Rep. poterit recte pronuciari. Quod verum illum, & omnium perfectissimum scopum, virtutem scilicet attinet, paucos ad hanc actionibus suis collimasse deprehendimus. Hujus tamen propositi scopi exemplum præbet nobis Resp. Hebræorum ab ipso Deo Opt. Max. prudentissimo legislatore instituta. Hæc enim si quæ unquam ad arduum illud & sublime veræ virtutis culmen viam adfæcit. At vero potentiam bellicam multis scopi istar propositam fuisse docent historia, & in his agmen ducit potentissima illa totius mundi dominatrix & Regina Romanorum Resp. quippe quæ (uti sublimioris spiritus Poëta Claudianus cecinit) *extra anni solisq. vias progressa est & margine cæli clausit opes.*
Cum

Cum hoc Romanæ Reipubl. scopo hac quidem in parte optime convenit alterum illud Græciæ ^{quæ} Lacedæmoniorum civitas, quæ etiam infinitis legibus huc spectantibus fuit instructa. Nec aliud quid ipsis Atheniensibus propositum fuit. Majores nostros, Germanos scilicet, quod attinet, quem scopum illi habuerint paullo post apparebit. Voluptatem porro multas olim gentes sectatas fuisse, docet historia Orientalis, Persarum præsertim & Assyriorum quorundam Regum, ut & Sybaritarum qui infami illo voluptatum cœno immersi, multis alijs sese negocijs implicare, stultum esse duxerunt. Ad quantum instituti humani genus divitias, pergimus. Non possunt autem nobis & olim & nunc deesse exempla, eorum, qui his cecomportandis studuerunt. Apud veteres Tyrus & Sidon, maritimarum urbium celeberrimæ, hodierni seculi pulchrius forte exemplum præstabunt Batavi, de quibus Poëta quidā minime obscurus & ipse in Batavis natus, ita canit

— — Trux ventilet ignes

Tisiphone, quatiatq; suos irata colubros,

Provehimur, quo lucra vocant &c.

Ex his igitur apparet, quam diversa sint humanæ vitæ instituta, dum alij hoc, alij aliud quid sectantur.

IV. Illud etiam sciendum est, & ex prioribus fit manifestum, multos in scopo ipso aberrasse, neque enim præter unicum illum & verum scopum alius quisquam rectus dabitur. Qui itaque aliud quid, quam veram virtutem spectarunt, in ipso statim limine aberrarunt. Multi in scopo quidem errarunt, in medijs autem non item. Nonnullos etiam, & in scopo & medijs ipsis aberrasse, certum est, & notat hoc peregre *Aristoteles l. 7. Polit. c. 13. ubi ita; interdum, inquit, scopus quidem propositus est rectus, atq; honestus, sed in agendo ab eo aberrant; interdum contra, ea quidem*

omnia, quæ ad finem pertinent assequuntur, sed finem sibi proposuerunt, malum ac primum aliquando ab atroz, longe aberrant, veluti in arte medendi, num neg, quale esse oporteat corpus sanum, recte interdum judicant, neg, ad finem sibi propositum accommodata efficientia nanciscuntur, in artibus autem & scientiis, hæc utraq, tenenda sunt, finis & actiones, seu effectiones ad finem, conferentes, & rursus l. 2. Polit. c. 9. ubi Lacedæmoniorum & Græcorum Remp. examinat. Vtrumque autem malum esse, & cum aliquo Reip. damno conjunctum, nemo ut existimo, in dubium vocabit.

V. Hisce ita veluti præmissis, nunc illud demum, quod nostri est instituti, agemus, & quid Majores nostri ante tempora Carolina, cum nondum Germaniæ corpus in unum coaluisset, propositum sibi habuerint, videbimus. Et quidem voluptatem, ut ab hac initium faciamus, minime eos sectatos fuisse, tum ex infantili educatione, satis quidem dura, tum etiam assiduis & indefessis ipsorum laboribus, præsentia animi in subeundis & exsuperandis periculis, imo toleranda morte ipsa satis elucet. Testatur id discretè Tacitus in his verbis, cum ita inquit: *Dominum & servum nullis educationis delictis, dignoscas, inter eadem pecora, in eadem humo degunt, donec ætas separet ingenuos, virtus dignoscatur.* Quod longe aliter fiebat apud Romanos, sequioris ævi: hi enim liberos suos molliter & delicate educabant, nec tam ad bellicos labores, perferendos, quam ad omnis generis vitia & lasciviam assuefaciebant, uti *Horatius* queritur l. 3. *Carm. od. 6.* Cum autem adeo duritèr liberos suos educarint, hinc videmus pro scopo voluptatem eos non habuisse. Nec minimum illud esse argumentum reor, quod ab habitu corporum desumitur. Germanos enim nostros, olim quidem (nunc etenim longe aliter sese res habet) omnes, Europæ, imo totius fere terrarum orbis gentes ac nationes

ones corporum proceritate, compacta membrorum firmitate exsuperasse certum est. Testantur id veterum scriptorum monumenta, quæ omnia hic apponere, supervacaneum foret; cum cuivis hæc satis sint obvia, ipse etiam Tacitus magna illis corpora tribuat. Unde autem tanta corporum proceritas, unde firmum illud membrorum robur, nisi è perpetuis exercitijs bellicis, educatione dura, tenui & parabili victus ratione, qua contentos Germanos fuisse, Tacitus his verbis testatur: *Cibâ simplicis, agrestia potu, recens fera, aut lac concretum: sine apparatu, sine blandimentis expellunt famem.* Cum autem hodierni Germani ab hoc instituto longius in dies abeant, & in vita delicatiores agant, neque iisdem exercitijs utantur, hinc adeo fit, ut habitus corporum veteri illi adeo dissimilis reddatur, uti notat Amplissimus Dn. Præses in tractatu quem de habitu corporum Germ. conscripsit. Verum scilicet illud est Quintilianianum: *educatio mollis & animi & corporis nervos debiliat, ac frangit.*

VI. Sed progrediamur ad divitias, quas non tam magni eos fecisse, quam potius contempsisse certum est. Apparet etiam illud ex Tacito nostro, ubi inter alia, *argentum, inquit, atq; aurum propitij an irati Dei negaverint, dubito.* Quæ verba, modo recte considerentur, id quod volumus præ se ferunt; ubi enim argenti atque auri usus aut plane nullus, aut perexiguus est, ibi non possunt aliquo in precio esse divitiæ, quia reliquæ opes ferme omnes nummi causa ambiuntur. Hinc Lacedæmoniorum Legislator Lycurgus, cum cives suos à cupiditate ditescendi quam maxime alienos vellet, usum nummi plane prohibuit, quod testatur Iustinus l. 3. c. 2. hic verbis: *Emil' inquit, singula non pecuniâ, sed compensatione mercium iussit; aurum argentiq; usum velut omnium scelerum materiam sustulit.* Postea tamen ferream

ream pecuniam ijs concessit, quod ipsum rectene an secus fecerit, huius loci ratio non exigit ut inquiram. Dicit porro idem Tacitus, quosdam Germanos, proximos ripæ Rheni aut Danubij, ob usum duntaxat commerciorum, quæ illis cum Romanis erant, pecuniam in precio habere, interiores vero i.e. à ripis his remotiores, quibusque adeo cum Romanis nihil negocij intercedebat, simplicius & antiquius permutatione mercium uti. Et hinc clarius patescit, quæ fini pecuniam in precio habere cœperint, nimirum ut sibi necessaria quæque ab alijs possent parare, quando Romani permutationem hanc mercium non admittebant. Nummo autem isti, quo usi fuerunt, quæ nota fuerit impressa, parum adhuc constat, noster Tacitus ita, *pecuniam*, inquit, *probant veterem & diu notam, Serratos Bigatosq.* Qui locus mirum in modum hætenus exercuit Criticorum scholam, quidam ita explicant, Serratos, quibus ferra; bigatos, quibus biga est pro signo; Lipsius serratos ita interpretatur, qui ad modum ferræ sunt incisi, Bigatos autem, quid sit, non explicat, merito tamen locus mendo laborare doctissimis quibusque videtur. Illud denique certissimum est, eos usque adeo contempsisse divitias, ut argentea vasa legatis & Principibus eorum muneri data, teste ipso Tacito, non in alia vilitate habuerint, quam quæ humo finguntur. A ditescendi itaque libidine eos etiam alienissimos fuisse, nemo non videt.

VII. Verum enim vero, cum omnis divitiarum natura sic se habeat, ut aut usui & necessitudini humanæ, aut elegantia, aut denique luxui inserviant, probe hoc ipsum observandum est, & videndum, quænam sint quærendæ, & quousq; civibus in bene constituta aliqua Rep. ditescere liceat. Lycurgum n. Lacedæmoniorum legislatorem certum aliquem terminum suis civibus posuisse, ultra quem diviti-

divitias augere non permittebatur, ex veterum monumē-
tis constat. Quæ usui & necessitudini humanæ condu-
cunt, omnino non possunt abesse, hisce enim qui carent,
vere miseri sunt appellandi, ut ut contrarium Stoicorum
turba asserere non dubitet, idq; ipsum, ut Persius ait:

braccatis illiæ Medis

Porticus occentes.

Hæ igitur merito cuilibet homini, & omni quidem studio
sunt acquirendæ, & has solas majores nostri, reliquis omni-
bus insuper habitis spectarunt, quippe qui tantum ea, quæ
adviētum & amiētum sunt necessaria, curarunt. Præterea
quæ ad elegantiam faciunt, ijs si quis careat, non quidē sta-
tim est miser, attamen ab omni parte felix dici nequit, quia
aliquod felicitatis hujus complementum (ut ita loquar)
vocari merentur. Quocirca ad ejus, qui in digniore præ
reliquis fortunæ gradu positus est, aut amplo aliquo mu-
nere fungitur, elegantiam, plus requiritur, quam qui mi-
nori honore gaudet. Nec illud sicco pede, (quod ajunt)
prætereundum est, opes hæc ad bene vivere non parum
prodesse, proinde huc usque civibus in qualibet Rep. vi-
ventibus ditescere licebit. At vero, quod superfluas illas,
& soli tantum luxui accommodatas attinet divitias, è re
fore minime putandum est, ut hisce corradendis homines
occupentur. Ex nimia enim divitiarum abundantia, e-
nascitur, uti id ex prioribus colligi potest, luxus, è luxu
porro omnis generis vitia promanant, quæ civitatem tan-
dem plane effæminant, & emolliunt. Testis est Romana
Resp., quæ mundo subacta nimij opibus luxurians ad
pessima quæque vitia sese inclinare cœpit, quod gravissimè
conqueruntur & deplorant prudentissimi scriptores. No-
bis nunc pro instituti ratione sufficiat unicū tantum ad-
duxisse testimonium, quod legitur apud *Lucanum l. 1. de bel-
lo Pharf.* & ita habet.

*Namq; ut opes nimias, mundo, fortuna, subacta,
Intulit, & rebus mores cessere secundis,
Prædaq; & hostiles luxum suaserunt rapina
Non auro terrore modus, mensaq; priores
Aspernata fames, cultus gestare decoros
Vix nurius, raptare mores, fecunda virorum
Paupertas fugitur, totog; arcesitur orbe*

Quo gens quæq; perit.

Testis etiam est historiæ parens *Herodotus l. i. p. 29.* Persas ante devictos à se Lydios non fuisse luxui aut ignavia deditos, quemadmodum postea, verba ejus hæc sunt: *πέγοντι γὰρ οἱ Λυδοὶ κατασπέρψαθαι, ἢ ὅτι ἀσθενεῖν ὅτι ἀγαθὸν εἶναι.* Erant scilicet Lydij natura ad voluptatem & luxum proni, horum opes & divitias cum nacti essent Persæ, à pristino illo & duro vitæ genere (quo antea usos fuisse eos, Ctesia excerpta testantur) ad mollius & delicatius paulatim deflexerunt. Est etiam porro nimia hæc, & vesana opum cupiditas, Democratijs cum primis valde noxia, quas Aristoteles mutari sæpius, ait, siquidem populus rebus acquirendis intentus Reip. negotia parum curet, eaque aut paucos aut unum aliquem paulatim ad se pertrahere patiatur.

LIX. Verum ne justo diutius, hisce immoremur, ad certum illum scopum, seu vitæ humanæ genus, quod veram virtutem sibi habet propositam, pergamus. Hanc autem Majores nostros, utpote Barbaros non quæsisse, vel exinde manifestum est, quia scopum hunc verum & optimum vel plane ignorarunt, vel saltem leviter cognitum habuerunt. Restat igitur ut potentiam bellicam eos intendisse dicamus, quod sane verum esse deprehendimus, siquidem omnia ipsorum instituta & mores, quæ huc unice directæ fuere, intimius aliquanto introspeciamus. Et hac quidem in parte, cum ipso Romanæ, Laconicæ & Atheniensis Rerum, scopo, Resp. Germanicæ convenit.

IX. Ex his igitur allatis non poterit non recte rem intelligentibus illico patere, in scopo, adeoque ipso statim limine Majores nostros aberrasse. Quod sane tam barbaræ & incultæ genti minus erit imputandum, aut vitio vertendum, cum ipsi etiam Græci, qui omnes alias nationes & populos, humanitate, sapientia, & morum cultu anteibant, alium finem non habuerint, quemadmodum etiam id ex historia Græca satis dilucide perspicui datur. Proinde hoc ipsum nulli mirari debemus, Germanos in tanta morum feritate, aciem mentis ulterius extendere, & ad nobilius & magis optatum vitæ genus eniti non potuisse. Nunc etiam media, quæ ad scopum hunc obtinendum faciunt, qualia & an satis idonea fini huic impetrando fuerint, dispiciamus. Audivimus enim supra Aristotelem nostrum dicentem, quosdam in scopo quidem errare, in ipsis autem medijs, quæ scopo huic conducunt, non item.

X. Hæc proinde hætenus de varijs variarum gentium scopis, adeoque majorum nostrorum vitæ genere, dixisse sufficiat. Nunc, quod vere est hujus loci, in Germanorum nostrorum vitam & res gestas accuratius aliquanto inquiramus, & cum scopum ipsorum satis noverimus, media quoque ad scopum hunc facientia examinemus, ut quantum Reip. ea conduxerint, nec ne, eo rectius appareat, deinde etiam quædam de armatura Germanica, & institutis bellicis adjiciamus; sequemur autem in omnibus hisce (uti hætenus coepimus) filum & ductum Cornelij nostri Taciti, quo usus est, in descriptione veterum Germaniæ armorum. Non possumus autem, meo quidem, ut ut tenui judicio, rectius hac in re progredi, quam si singulos ætatis gradus ob oculos ponamus, & quid cuivis ætati competat, quibus rebus assue fieri debeat, nec ne, recte ponere exinde enim clarius elucebit, cum à teneris assue-

scere adeo multum sit, anne etiam ita instituerint actio-
nes suas, majores nostri, ut scopum hunc assequi potuerint.
Recte à *Aristoteles l. 7. Polit. cap. 17.* ubi de educatione in-
fantili agit, lacte infantes ali debere ostendit, quia cibus
iste, ut ille inquit, *ἔστι τρεφὴ μάλιστα τοῖς σώμασι οἰκεία*, aut ut
Hippocrates *l. 10.* de usu partium ait, *ἀδελφὸν καὶ συγγενὲς τῷ
αἵματι*. Quod si ita est, ut certe aliter sese habere non po-
test, ipsa quodammodo natura, hunc præ alijs cibum com-
mendare nobis videtur. Dicit porro Aristot. l. c. etiam o-
mnes bellicosas gentes & nationes quæ habitum milita-
rem sibi acquirere voluerint, hoc ipsum observasse. Et
quidem, apud majores nostros ut *Tacitus* ait : *Suaqueque
mater uberibus alis : nec ancillis aut nutricibus delegantur.* Quem
morem, siquem alium, satis laudare nequeunt moderni
scriptores. Et sane non tantum olim apud Romanos &
Græcos longe aliter sese res habuit, sed & hodierno maxi-
metempore, mos ille pravus & perversus Germaniam no-
stram invasit, & usque adeo jam invaluit, ut delicatiores
foemellæ pene opprobrij loco habeant, uberibus suis in-
fantem alere. Ex qua re quid mali oriatur, politiores
quam optime judicabunt. Reprehendit jam olim pessi-
mum hunc morem *gravissimus Autor Plutarchus*, in aureo
sane libello, quem *περὶ παιδων ἀγωγῆς* conscripsit, ubi mul-
tas adducit causas quibus id fieri debere negat, videatur
etiam omnino hac de re longe elegantissima Favorini
Philosophi dissertatio, reservata nobis ab *Agellio Noft. Ar-
sic. l. 12. c. 1.* ubi multa in hanc rem legi possunt. Sed hisce
diutius inharere nostrum non est instituti, quippe qui *ὡς ἐν
παρόντι*, & facem prælucente Tacito nostro, hoc duntaxat
tangimus. Et sane usque adeo hunc cibum majores no-
stri semper amarunt, ut etiam adulti maximam partem la-
cte vesci fuerint soliti. *Agricultura non student*, verba sunt
Caij

Caij Cæsaris, l. 6. de Bello Gallico, *majorq; pars victus eorum in lacte & caseo consistit.* Et rursus l. 4. ejusd. belli sic ait: *Neque multum frumento, sed maximam partem lacte atq; pecore vivunt: multumq; sunt in venationibus.* Quibus Iulij verbis noster quoque Cornelius ad stipulatur. *Cibi, inquit, simplices, agrestia pomarecens fera, lac concretum.* Fecerunt & hoc aliae gentes & nationes bellicosæ, ut Scythæ, Geloni, qui lacte eoque equino victitarunt. Cum igitur cibis iste quam maxime bellicis laboribus deditis, pronunciante ipso Aristotele nostro, adeo conducatur, & probe hoc ipsū observarint majores nostri, hinc adeo videmus, recte eos hac quidem in parte scopo suo consuluisse.

XI. Præterea quoque frigoribus tolerandis pueros assuefieri debere recte censet Aristot. l. c. his verbis: *Συμφέροι δὲ τοῦθ' καὶ πρὸς τὴν ψυχὴν συνίστηεν ἐκ μικρῶν παιδῶν: τὸ γὰρ καὶ πρὸς ὑγίειαν, καὶ πρὸς πολεμικὰς πράξεις εὐχερὲστότατον. Διὸ πρὸ πολλοῦ ἐστὶ τῶν βαρβάρων ἔθος, τοῖς μὲν ἐς ποταμὸν ἀποβάπτειν τὰ γινόμενα ψυχρότατον, τοῖς δὲ σκάπασμα μικρὸν ἀπμιχῆν: οἷσι, κελτοῖς. Πάντα γὰρ ὅσα δυνατόν ἐξιδόν, τοῦθ' δεχόμενον βέλτιον μὲν ἐστί.* Ex quibus multo elegantissimis Arist. nostri verborum oraculis colligimus, à teneris pueros duricie & frigoribus assuefaciendos esse, ne scilicet fiant molles & delicatuli. Et sane frigoris tolerantiam cordatissimi Autores in militibus & belli ducibus, æque ac alias virtutes requirunt. Claudianus 3. Consulatu Honorium laudat, eo quod edoctus fuerit:

Frigora sæva pati, gravibus non cedere nimbis,

Ægæa potare nives &c.

Et rursus in divino illo carmine, quo Stiliconis laudes persequitur, sic elegantissime canit l. 1.

— Quoties sub pellibus egis
Edonas hyemes & tardi flabra Booræ

*Sub dio Rhodan' extis, cumq; igne propinquo
Frigora vix ferrent alij, tunc triste rigentem
Danubium calcabat eques, nivibusq; profundum
Scandebat cristatus. Athos; lateq; corusco
Curvatas glacie sylvas umbone ruebas.*

Cum itaque hanc virtutem adeo extollant nobilissimi quique scriptores, quod multis præterea exemplis clarum fieri poterat, hinc non parum bellicis rebus eam conducere merito statuimus, quod etiam Aristoteles h. l. fatetur, Quapropter Poëtæ Martem bellorum Deum adhuc tene-
rum plantas suas frigidissimo Thraciæ fluvio, Strymone, abluisse fabulantur, qua re nihil aliud indigitare voluerunt sapientissimi Mortales, quam militem frigorebus exsuperandis aptum esse debere. Hoc autem cum bene advertissent Majores nostri, non mirum est, à teneris (uti Græci ajunt) unguiculise eos id operam dedisse teste Tacito & alijs, ut frigora & inædiam ferre possent. Non autem hæc frigoris exsuperantia tantum virtuti bellicæ (ut Aristot. recte monet,) sed & acquirendo & tuendo corporis robori, ac sanitati cum primis conducit, & vero ad munia quavis militaria dextere exsequenda, corporis robur haud parum proficere, omnium pene calculo firmatum est. Hæc itaque etiam in parte bene rebus suis prospexerunt, & egregiam laudem sunt promeriti Majores nostri.

XII. Recenset autem Arist. noster duos potissimum modos, quibus hoc fieri consueverit. Dicit autem quosdam Barbaros, quos ille Celtas vocat, nos merito cum doctissimo Piccarto, Majores nostros, præsertim Rheno proximos fuisse conjicimus, recens natos infantes *εἰς ποταμὸν ἀνοβαίνεν ψυχρὸν. Claud. 2. in Ruff. sic canit:*

Et quos nascentes explorat gurgite Rhenus.

Id etiam addendum puto, duabus maxime de causis id eos fecisse,

fecisse, quoniam scilicet primo existimabant, se hoc mo-
do explorare posse, anne etiam ex legitimo conjugio na-
tus ille infans foret. Iulianus Imperator in Epist. ad An-
tiochum Misopogona: *Spurijs, inquit, cum primum nati sunt,*
fluminibus superponuntur, ac spurios quidem mergi, legitimos a-
quis innatare ferant. Vnde non ineleganter Nohnus in Dio-
nyssiæ Rhenum vocat *ἰλὸν ῥήνον*. Nec defuere, monea-
te Lipsio, qui Rhenum den Rhein/ quasi purgatorem sunt
interpretati, quod pura conjugia indicaret. Altera por-
ro infantes fluvio mergendi causa hæc erat, ut statim in
ipso vitæ limine (uti sic dicam) duriciei & frigorebus na-
tos suos assuescerent. Quæ res & ad valetudinem mul-
tum prodest, & ad munera militaria; ut etiam antea dixi-
mus, aliasque vitæ necessitates commodè obeundas & fe-
rendas. Et hæc de primo quidem modo dicta sit sufficiant.
Alter porro modus est; *οὐκ ἴσως μὲν ἀμύχαν*, exiguum
recenter natis inducere amiculum, tantum ut paulum fri-
gora ferre addiscant. Quod maiores nostri non tantum
in lucem modo editis, sed & adultis promiscue omnibus,
nullo habito sexus aut ætatis discrimine fecerunt. Phi-
lippus Cluverius, vir alias undiquaque doctissimus, & re-
rum Germanicarum indagator solertissimus, in Antiqua
sua Germania, conatur nobis persuadere, maiores nostros
plerosque nudis incessisse corporibus, & ita quoque de-
pingi eos curavit, quod sane, (pace summi Viri dixerim)
est contra omnium antiquorum testimonia, qui aliquem
ijs, quamvis perquam æstivum tribuunt amictum. Et sa-
ne adversus asperitatem cœli, & frigidi lovis injuriam sa-
tis muniti esse non potuissent, siquidem omnino intecti
fuissent. Tenui itaque vestitu induti fuerunt, & testis hu-
jus rei locupletissimus inter alios est, Cornel. nosser, qui in
capite 17. de moribus Germanie: Tegmina omnibus sagum sibi lar-

aut si desit, spina confertum, caetera intecti. Etiam ferarum
pellibus investitu usi fuerunt, teste eodem Tacito, cum
quod *Julius Caesar l. 6. de bello Gallico* consentit: *Pellibus, in-*
quit, aut parvis rhenorum tegumentis utuntur, magna corporis
parte nuda. Et rursus *l. 4. ejusd. belli* hæc verba habentur:
In eam se consuetudinem adduxerunt, ut locis frigidissimis, neque
vestitus præter pelles habeant quicquam (quarum propter exigui-
tatem, magna est corporis pars aperta) & laventur in flumini-
bus. Nec alius (verba sunt Cornelij nostri) fæminis quam viris
habitus, nisi quod fæmina sæpius lineis amittibus velantur, eosq;
purpura variant, partemq; vestitus superioris in manicas non ex-
sendunt, nuda brachia ac lacertos, sed & proxima pars pectoris
pater. Magna igitur ex parte nudati fuerunt tam viri quam
fœminæ. Fecerunt itidem hoc olim multæ aliæ gentes,
bellicis laboribus deditæ, quas omnes hic recensere, pre-
tium operæ non videtur. Est vero egregia militis vir-
tus, frigoribus & horridæ tempestati, si quando necessitas
exigat non cedere; probe hoc olim advertisse videtur ful-
men illud Mavortis, Hannibal, qui milites suos à meridie
& sole venientes, adeoque frigoribus impatientes, ante-
quam horrible illud ad Trebiam proelium cum Romanis
aggrederetur, callido artificio adversus frigus perferen-
dum munivit. Sic enim Lucius Florus, Romanæ histo-
riæ Epitomator longe elegantissimus & veracissimus: *Tunc*
callidissimi, inquit, hostes frigidum & nivalem nati diem, quum
se ignibus prius, oleoq; fovissent, (horribile dictu) homines à meri-
die & Sole venientes, nostra nos hyeme vicerunt. Nectantum
ad frigus tolerandum facit, nudato ita corpore incedere,
sed etiam robori corporis, & compactæ membrorum fir-
mitati haud parum conducit, non autem solum frigus
corpora reddit compactiora, sed etiam ipse Sol, quorum
corpora radijs suis penetrat, eorum ossa duriora & magis
solida

solida reddit, itaque duplex inde commodum suboritur. Narrat *historia* *paren's* Herodorus in *Thalia* c. 12. de Persis & Ægyptijs, hanc miratu dignam historiam. Cum Camby-
ses Rex Persarum Ægyptijs bellum fecisset, & cum illis a-
cie decertasset, eorum, qui ab utrâque parte ceciderant,
ossa, soliditate & duritie adeò differabant, ut Persarum qui-
dem capita ad minimum digiti impulsu dissilirent Ægy-
ptiorum vero nec ipso lapidis ictu perfringerentur. Cu-
jus rei causam Autor hanc allegat, quod Ægyptij semper
nudatò ad Solem capite incesserint, Persæ vero pilcos ges-
tarint, ipsa Herodoti verba huc apponi merentur, quæ ita
habent: Αἱ μὲν τῶν Περσέων κεφαλὰ εἰσι ἀσθενέες, ἔτω, ἅτε, εἰ
θέλεις ψήφῳ μένῃ βαλέειν διαπληγνέεις. Αἱ δὲ τῶν Αἰγυπτίων, ἔτω δὴ
πίχυρα, ὡς μόγις ἀν-λίθῳ παίσας διαρρήξεας. Αἵτιον δὲ τῶν τοῦ
ἐλθον (καὶ ἐμὲ γ' εὐπετέας ἀπειθον) ὅτι Αἰγυπτίοι μὲν, αὐτίκα διὰ παι-
δίων δεξιὰ μὲν ξυρεῦνται τὰς κεφαλὰς καὶ πρὸς τὸν ἥλιον παχύνεται
τὸ ὄστρον. Τέθεισι μὲν δὴ τότῳ ὅτι αἵτιον ἰχυρὰς φορέειν τὰς κεφαλὰς.
Τοῖσι δὲ Πέρσῃσι ὅτι ἀσθενέας φορέουσιν, αἵτιον τόδε. σκητροφέουσι ἐξ ὀ-
χῆς, πλάγας πάρας τι φορέοντες. Denique si ita tenui veste quis
amiciatur, tum liberius excrescit, & ad justam magni-
tudinem facilius pervenit. Hinc adeo elici potest, cum tot
tantaque commoda hanc nuditatē commendent, recte
fecisse majores nostros, quod ita tenuiter fuerint vestiti.

XIII. Illud in nostris Majoribus meritò quis repre-
hendere possit, quod quemadmodum frigora & ine-
diam tolerare potuerint, ita ad sitim æstumque patien-
dum indociles fuerint. Quæ sane non minima vir-
tutis militaris laus habetur, & à doctissimis quibusque
scriptoribus mirum in modum tantum non in cœlum ex-
tollitur. Peregregijs id ipsum versiculis in ante landato
Heroë commendat Silius Italicus l. 1. de bello Pun. secundo, qui
ita habent:

*Nec pulvere fessum
Agminis, ardenti labefecit Sirius astro,
Flammi feris tellus radiis cum exusta dehiscit,
Candentiq; globo medius coquit aethera fervor,
Femineum putat inventa jacuisse sub umbra
Exercetq; sitim, & spectato fonte recedit.*

Quocirca quamvis hac in parte non immerito vapulent Germani nostri, attamen aliquam mihi quodammodo excusationem meriti videntur, quippe cum plerique frigido sub love positi, adeoque perferendo æstui tantopere non illaborarint. Germaniam enim nostram, respectu quidem Hispaniæ, Galliæ, Italiæ, maxime versus Arctum spectare, neminem poterit præterire, quapropter bene Tacitus, apud eos plurimum hyemem occupare, ait. Quod sitis impatientiam attinet, eos cum omnibus alijs gentibus ac nationibus bellicosis hoc vitium commune habuisse, adeoque minorem hujus rei culpam in eos redundare constat.

XIV. Et hætenus quidem ad ductum Arist. nostri quem in omnibus merito nobis proponimus, majorum nostrorum infantiam contemplati sumus, eamque scopo ipsorum satis accommodatam fuisse intelleximus. Quod pueritiam & reliquos adolescentiæ annos attinet, non temere legimus, eos ullis exercitijs fuisse imbutos, quod tamen longe aliter apud Romanos & Græcos fiebat, ibi enim pueri, adolescentes, literis, Musicæ, palæstræ, operam dabant. Vnde & Terentianus ille Parnieno in Eunuchosic ait:

*Fac periculum in literis
Fac in palaestra, in Musicis, qualiberum
Scire æquum est adolescentem.*

Quamquam Romani non tam musicam amarunt quam potius contempserunt, & gravi viro indignam judicarunt. E vero refertur de quodam Romano Imperatore, seu duce bel-

ce bellico, cum filium eleganter admodum cantantem audivisset, in hæc verba prorupisse: *Nonne te pudes, quod tam scite canas.* Attamen reliqua illa exercitia cum Græcis ple-
raque comunia habuerunt. Majores nostri hisce gymnasticis non fuere dediti, nulla apud eos palaestra, nulla certamina Olympiaca, nullus campus Marrius. Et sane non tam exercitio corporis vacarunt adolescentes Germanici, quam servilibus insuper operibus adhibiti fuerunt. Diserte hac de re Tacitus: *Dominum, inquit, & servum, nullis educationis deliciis dignoscas. Inter eadem pecora, in eadem humo degunt, donec ætas separet ingenuos, virtus agnoscat.* Quem morem laudaverit quis an vero atro potius carbonē dignum judicavit equidem primo quidem intuitu haud parum ambigi poterat. Romanis & Græcis hoc olim in more positum non fuisse antea probavimus; habemus itaque hic diversa diversarum gentium attamen idem pro scopo habentium instituta. Romani enim & Græci, qui nullam aliam, quam Majores nostri scopum agnoverant, cum Juventutem suam bellis quam maxime aptam cuperent, nec melius & accommodatius remedium huic rei invenirent alterum, illam palaestræ operam dare, in luctando, currendo, & hujusmodi exercitijs excellere voluerunt, ut ita paullatim periculis & laboribus bellicis assuescerent, quia exercitia hæc & acquirendo corporis robori, & virtuti militari conducere sunt arbitrati. Et sane egregie hoc ipsum commendat *Arist. l. 8. Pol. c. 4.* si quidem cum aliquo modo fiat, & justos limites non excedat, reprehendit enim Locedæmonios, quod nimis multum heic rei tribuerint, adeoque cives suos, ut ille ait, *Hyperides* fecerint. Maxime etiam hæc exercitia ita debent institui, ne corporibus obsint & crescendi vigorem impediant, quod etiam ipse *Arist. l. c.* monet.

Majoribus nostris nulla ejusmodi exercitiorum genera
fuerunt cognita, ideoque ut illi haberent, quibus natos suos
futuris laboribus & periculis bellicis asvescerent, hoc
institutum usi fuerunt, ut scilicet pueri & adulescentes, à
teneris duricie & patientiæ studerent; & ita nullum de-
inceps discrimen sua virtute majus æstimarent. Quam finem
etiam Lacedæmonii, illos, qui nondum ex ephebis exces-
serant, ad artem Leucophrydis Dianæ, quæ vocabatur, de-
ductos, durissimis verberibus afficiebant, nec pausam hu-
jus rei faciebant, priusquam totum corpus sanguine pas-
sim nataret, adeo quidem ut multi præ acerbissimo do-
lore exspirarent. Qui tamen mos multis hodie, & qui-
dem merito, crudelitatis nomine accusatur, & huic uti-
que longe præfero illud majorum nostrorum institu-
tum, quippe qui ἐκ περὶ αὐτῶν, uti *Aristot. l. 7. Polit. c. 17.*
ait, paulatim pueros suos dura pati docuerunt. Et pro-
fecto si quidem hanc ipsam antiquorum Germanorum
educationem cum altera illa Romanorum & Græcorum
conferas, simul etiam utrumque scopum probe conside-
res, non poteris non primas huic partes concedere. Hæc
enim Germanorum effecit, ut nulli vitæ periculo sese
subdlexerint nullum à se discrimen esse alienum putarint,
qua in re egregie finem suum sunt assecuti. An id etiam
Romanorum & Græcorum palæstra præstiterit, aut præ-
stare potuerit, nunc non disputo. Certe unicus The-
banæ rei Atlas, & summus belli Dux Epaminandas apud
Nepotem cives suos sic alloquitur. *Si principes Græciæ,*
inquit, esse vultis, castris vobis utendum est non palæstra.
Literarum & Musices studium data opera jam prætermi-
to, neque enim ad scopum illorum obtinendum hoc quic-
quam fecit. Cum literæ potius sint artes pacis ac proinde
in bello aut nihil aut certe parum valeant, Adde quod ma-
jores

jores nostri, utpote Barbari, literarum secreta plane ignorarint nec legere quidem aut scribere potuerint.

XV. Quamvis itaque hac palaestra, & hisce ludicris exercitiis, non fuere ad res bellicas preparati, non tamen alia illis media defuerunt; quibus jam Iuvenes & armis instructos melius exercerent. Audiemus enim ex Tacito nostro, Principes Iuventutis Germanicæ, semper aliquo delecto Iuvenum globo fuisse cinctos, qui inter sese de virtute & primo apud principem suum loco decertarent: ita enim Tacitus: *nec rubor, inquit, inter, comites adspici: Gradus quin etiam & ipse comitatus habet, iudicio ejus, quem sequuntur. Magnæ, & comitum emulatio, quibus primus apud principem suum locus. Imo quod magis adhuc mirere, ipsi principes inter sese certant, uter alterum numero acerrimorum comitum superaret, quæ fuit in pace decus, in bello presidium, Maxime enim hi legationibus adhibiti fuerunt, & ipsa plerumq. fama bella profligarunt.* Et hoc mirum in modum excitavit ardorem animorum juvenilium, & virtutem bellicam. In proelio comites pro principe suo certant, ipsi Principes virtute vinci in turpissimis habuerunt, ideoque & inter se veluti, & cum hoste decertant. Verum scilicet illud est Paterculi dictum *l. i. c. ult.* ubi: *Alit, inquit, emulatio ingenia, & nunc invidia nunc admiratione incitationem accendit.* Hæc autem omnia egregie ipsorum scopo respondere exinde manifestum est. Usque autem adeo quietis impatientes fuerunt Iuvenes illi, ut si quando civitas illa, in qua orti essent, longa pace & ocio torperet, ulro eas nationes, quæ tum bella gerebant, peterent. Fecerunt autem hoc ideo, ut in perpetuo exercitio bellico permanerent, nec domi longo ocio victi desides fierent. Illud cum primis æqua recti iudicii lance perpendi debet, an scilicet hoc ex usu istius Reip., cujus erant Iu-

venes hi, fuerit nec ne, res enim periculo carere mihi non videtur. Quoniam autem in omni beata Rep. illud magnopere cavendum est, ne cives fiant desides & ignavi, sed ut semper aliquid agant, in illa certe Rep., quæ instudio bellico versatur, quam maxime hoc præcaveri debet, desidia enim uti omni societati, ita præ reliquis, bellicis rebus deditæ obest;

Ocium Reges prius & beatas

Perdidit urbes.

Omni itaque conatu hoc agendum est, ut civibus torpor ille excutiat. Ponendum quoque est, ad studia bellica institui & idoneum reddi neminem, nisi in ipsa militia, posse: necessum itaque erit, ut in aciem procedat, ibique sese in armis exerceat. Hoc ita firmiter posito, ab altera tamen parte periculum est, ne Iuvenes illi, siquidem pro rata ipsorum voluntate cuivis operam suam collocent, Reip. eripiantur. & ita quemadmodum olim Perides agebat, pulcherrimum totius anni tempus, Ver scilicet, de mundo tollatur. Id ut evitetur magna certe cautela opus erit, neque ex usu fore videtur, ut Iuvenibus istis liberrium hujus rei arbitrium permittatur, sed ut publica, istius civitatis, cujus sunt cives, autoritate militent, debent itaque nomina sua apud Magistratum, antequam in militiam proficiscantur, profiteri. Quod præceptum hodierno quoque tempore cum primis egregie observant Helvetii, qui tranquillatis in patria rebus, operam suam promiscue & Hispaniæ & Galliæ Regibus collocant, nec tamen, nisi autoritate publica armati stipendia faciunt, haud enim unquam licitum est in Helvetia, aut Hispano citra hanc auctoritatem publicam militem legere, aut Helvetio, operam suam absque hac locare. Hinc adeo fit, ut necessitate aliqua ingruente, Helvetiis nunquam exercitatus

citatus desit miles,quippe, cum tempus postulat, militem suum ipsi revocare possunt. Annē autem Majores nostri aliqua hac in re cautela usi fuerint, nec ne, in proclivi non est affirmare, illud tamen asserere non dubitamus; Iuvenes illos non intellecta principis sui voluntate, operam suam peregrinis non addixisse, quod etiam sufficere potuit.

XVI. Neque vero etiam illum morem silentio prætereundum esse puto, quo usi fuerunt in armandis Iuvenibus illis, non licuit enim cuiquam Iuveni ingenuo pro lubitu suo arma capere. Innuīt id etiam exercitij hujus nostri prora & puppis *Corn. Tacit. c. 13.* cum ita inquit. *Arma sumere, non ante cuiquam moris, quam civitas suffecturum probaverit, tum in ipso concilio vel principum aliquis, vel pater vel propinquus scuto frameaq; Iuvenem ornans, hac apud illos toga, hic primus Iuventa honos, ante hoc domus pars videntur, mox Respubl.* Quod profecto institutum summis ego laudibus extollendum puto multum enim ad virtutem bellicam consequendam id ipsum profuisse arbitror, quia civitas non ante quemquam armis induebat, quam se tanto honore dignum gessisset, & virtute mereri videretur. Apud Lacedæmonios non ante juvenus arma accipiebat, quàm militatum irēt, & quod apud Majores nostros in concilio à principibus aut propinquis, illud apud eos à matre Lacæna fiebat, quæ elypeo filium obarmans, his cum verbis alloquebatur : ἡ τὰν ἡ ὀπλῖτας. Cui Sportanorum instituto, longe illud majorum nostrorum præfero, hi enim in publico concilio, talem Iuvenem scuto frameaq; ornabant. Quod sane ad æmulationem virtutis haud exiguum attulit momentum, reliqui enim Iuvenes, qui nondum hoc honore digni judicabantur, & armigeri duntaxat erant, hac rem in modum incendebantur. Non tantum autem tum
tem-

temporis hoc apud Germanos obtinuit, sed multis post seculis illud adhuc fuit observatum. Legimus enim fortissimum Imperatorum Fidericum Anobarbum, filium suum Henricum in plenis comitijs, armis induisse, quod factum fuit seculo post N. C. duodecimo. Hodie autem mos ille in Germania plane expiravit & qui hodie in Principum aut Ducum aulis ex ephebis excefferunt, adeoque tractandis armis apti habentur, colapho solent excipi, qui tamen mos à Romanis ad nos venit, qui hoc modo mancipia sua libertati reddebant, uti testatur *Claudianus 4. Hon.* An autem majores nostri certum aliquod ætatis tempus expectarint, non est integrum, mihi id magis probatur, illos non tam annos quam virtutem Iuvenum respixisse, quod etiam Taciti verba innuere videntur cum *neminem prius arma sumere inquit, quam civitas suffecturum probarit.*

XVII. Iam illud pulchrum, quod Autor noster de singulari & pene incredibili majorum nostrorum castimonia affert, quod scilicet nimis maturas contrahere nuptias, nefas habuerint. Verba ipsa merito huc transcribimus: *Sera, inquit Iuvenum Venus, eoque exhausta pubertas, nec virgines festinantur, eadem juvenia, similis proceritas, pares validique miscentur, ac robora parentum liberi referunt.* Hæc mehercules Cornelij verba arguunt, majores nostros hac quidem in parte omnibus, etiam totius terrarum orbis gentibus longe esse præferendos, neque enim hoc de ullo alio populo aut natione legemus. Et hac in re Respubl. nostra Germanica, utut incultra ac barbara, omnibus alijs, quotquot sunt Rebus publicis palmam præripit. Nec solus Tacitus de Majoribus nostris, sed Iulius quoque Cæsar l. 6. de Bello Gallico id ipsum asserit, his verbis: *Qui diutissime, inquit, impuleres permanserunt, maximam inter suos ferunt laudem; hoc ali staturam, ali hoc vires, nervosque confirmari putant.*

putant. Intra annum vero vigesimum fœmina noticiam habuisse, in turpissimis habent rebus. Vsq̃ue adeo casta fuit Gens Germanica! quantum tamen hodie ab illo more plerique absumus, id vero vel lippis & tonsoribus notum est, cum mero meridie clarius id ipsum constet. Nunc scopum illorum cum instituto hoc conferamus, & num satis bene hæc in parte rebus suis consuluerint, videamus. Recte autem summus *Aristot. nos̃ter, l. 7. Pol. c. 16.* ubi matrimonij tempus definit, hoc etiam inprimis bono Legislatori attendendum esse monet, ne aut præmaturas, aut nimis etiam seras cives ipsius incant nuptias. Vtrumque autem maximo cum incommodo, & totius Reipubl. detrimento conjunctum esse demonstrat. Hac enim re Iuvenum corpora exhauriuntur, naturalis calor dissipatur, adeoque multum nativo robori decedit; uti ad justam staturam minime exerescere queant. Quid? quod infantes illi ex eiusmodi conjugijs nati, fiant tenero & invalido corpore, unde sequitur tandem, ut aut præcoci fato rursus abripiantur, aut si in vivis permanserint, & adoleverint, infirmis! & valetudinariis civibus Respubl. laborare incipiat, dum liberi parentum robora minime referant. Vnde Agamem̃on non apud *Tragicum Senecam Act. 2.* cum Pyrrhum insigni aliqua vellet contumelia notatum, hoc ei tanquam crimen obijcit.

*Ex virginis concepte furtivo stupro,
Et ex Achille nate, sed nondum viro.*

Et sane ex parvis & invalidis etiam similes prognasci liberos, in confesso, uti arbitror, erit, quod probe olim notarunt Lacedæmonij, qui Regem suum ideo multarunt, quod parvam uxorem sibi matrimonio sumpsisset, tanquam qui non tam βασιλεὺς, quam βασιλικὸς illis obtundere tentaret, quod recenset Plutarchus in libello περὶ

αἰδῶν ἀγῶνις *Vt enim in equis est Patrum virtus, teste Hora-*
tio, ita quoque imbecillia eorundem corpora solent re-
ferre. Vid. Amplissimus *Dn. Praeses in] ante laudato lib. de*
habitu corp. Germ. p. 101. Hæc autem omnia extreme per-
niciosa esse, cum alijs omnibus Rerump. formis, tum
præcipuè iis, quæ gloriam bellicam aucupantur nescio an
non quivis cordatus mecum judicarit: Et verò quantum
aliæ gentes bellicæ bono corporis habitui deferant ex su-
pra dictis facilis conjectura capietur. Hoc tamen ex-
cipimus si forsan Resp. aliqua civitum inopia labore, non
nihil hac in re posse conniveri, imo tum præcocia con-
nubia quam maxime debent permitti. Modernus Hispani-
æ Rex, quod Regnum suum coloniis huc illuc deductis
exhaustum videat, maturas nuptias ineuntibus & quam
multos liberos procreantibus certa quædam præmia con-
stituit, & immunitates pollicetur. Est etiam apud antiquos
lex quædam quæ vacationem ab oneribus publicis, parenti-
bus πολυτέκνοις, defert. Nimis porro seras contrahere nu-
ptias, ex usu quoque non videtur, & reprehendit hoc
cum primis *Aristot. l. c.* Medium autem majores nostros
hac quidem in parte egregie observasse, & scopo suo
quam optime prospexisse, certum est.

XIIX. Nec vero ipsa jura matrimonialia ab hoc in-
stituto seu scopo illorum aliena fuisse deprehendimus.
Non enim maritus sponsæ suæ munera obtulit *ad delicias*
muliebres quasita; nec quibus nova nupta comaretur, sed boves
& froenatum equum cum frama gladiog. Addit autem egre-
gie Tacitus hanc causam. *Ne se mulier extra virtutum cogi-*
zationes extrag. bellorum casus putet, ipsis incipientis matrimo-
nii auspiciis admoneri, venire se laborum periculorumq. sociam,
idem in pace idem in proelio passuram, ausuramq. Hoc junctos
boves, hoc paratum equum, hoc data arma denunciare. Do-
cuerat

cuerat autem iuprā Tacitus. uxores maritos suos in proelia comitari, quem morem infra examinabimus. Apud Romanos præsertim sequioris ævi longe aliter sese res hæc habebat, ibi enim maritus uxori munera ad delicias muliebres quæsitâ offerebat, hoc autem à scopo bellico quam maxime alienum fuisse, nemo certe nisi aut extreme malus, aut plane stolidus negaverit. Proinde & hic mos laude sua non caret.

XIX. Ad instituta porro domestica & modos acquirendi quod attinet, & num hæc quoque scopo ipsorum fuerint accommoda, nunc etiam brevibus consideremus. Duplicem autem acquirendi modum, alium naturalem, alium artificialem esse peregre inculcât *Aristor. l. 1. Pol. c. 4.* Artificialem quod concernit, parum hunc ad se pertinere putarunt majores nostri, utpote qui maxime in acquirenda pecunia est accupatus, pecuniam autem & divitias illas artificiales plane contempsit antiqua Germanorum virtus, quod etiam supra demonstravimus. An hoc fini ipsorum fuerit congruum, judicabit C. Iul. Cæsar. qui libro 8. de Bello Gallico sic scribit: *Ne qua, inquit, oriatur pecunie cupiditas ex qua re factiones dissensionesq; nascuntur, ut animi equitate plebem contineant, cum suos quisq; opes cum potentissimis æquari posse videat.* Quæ verba ex ipso civilis prudentiæ meditullio sunt desumpta, & cum his egregie consentit *Aristor.* Cum itaque ex cupiditate divitiarum oriantur factiones, profecto necesse est, interire Resp., maxime autem populares, in quibus inimicitia periculosiores sunt juxta libertatem, & inter arcana tyrannica ab *Aristor. l. 5. Pol.* recensetur, inter subditos ferere lites. Adde quod divitiæ illæ plerumque cum aliorum injuria veniant conjunctæ, ex injurijs autem oriuntur querelæ, ex querelis porro discordiæ civiles. Et sane has Rerump. formas

interitui quam proximas esse, ubi qui ditissimus est, optimus habetur, jam pridem in confesso est. Quid? quod alias inexpugnabiles istac re sola superatas fuisse legimus.

Ἡ φιλοζηματία σπαρταί ἔλοι, ἄλλο δὲ ἰδέν.

Memorable est, quod *Autor Noster* c. 44. De Suonibus exemplum refert: *Est apud illos*, inquit, *& opibus honos, eoque annus imperitas, nullis jam exceptionibus, nec precario juer parendi.* Tantum scilicet libertati officit sacerrimus ille divitiarum ardor. Nec Nobis illud ob stare videtur, quod *Aristot.* l. 7. *Pol. c. 8.* ait: *Ἐπάρχειν δένειν καὶ πᾶσι ζηνμάτων ἰσμεῖαι, ὅπως ἔχωσι καὶ πρὸς θεοῦ καὶ αὐτὰς χρείας, καὶ πρὸς πολεμικάς.* Non enim modicum pecuniae usum, sed insatiabilem duntaxat ejus cupiditatem damnamus. Majores nostros ad commercia quam maxime necessaria, & propter indigentiam humanam instituta, nummo saltem usos fuisse supra fuit probatum. Et vero artificialem hunc acquirendi modum recte eos neglexisse, ac proinde hic etiam suis rebus quam optime consuluisse, asserere nulli dubitamus.

XX. Naturalibus itaque divitijs, quibus omnino cedere non potuerunt, contenti, victum quam maxime sibi ex animalibus tam mansuetis quam feris compararunt. Agriculturae non multum studuerunt, eo quod majorem hoc vitæ genus laborem requireret, erant enim majores nostri pacis tempore, somno ciboque dediti, adeoque labores graves, quantum poterant, fugiebant, & à sese removebant. *Nec arare terram* (verba sunt *Autoris nostri*) *aut expectare annum tam facile persuaseris, quam vocare hostes, & vulnera mereri, pigrum quin imo & iners videtur, sudore acquirere, quod possis sanguine parare.* Quotiens bella non ineunt, multum venatibus, plus per otium transigunt dediti somno ciboque. Quibus Taciti verbis ad stipulantur hæc *Julij Caesaris* l. 6. de *Bell. Gall. Agricultura*, inquit, *non studens, majorque pars vi-*

Etus

bus eorum, in lacte & caseo, & carne consistit. Quæ loca id quod volumus præ se ferunt; vitam autem postoralem ad res bellicas magis accommodatam esse, quam illam, quæ in agri cura vertitur, exinde liquet; quod & facilius victus ex pecore quam agricultura potest parari, neque adeo multum fatigantur homines pastores, quam qui rus exercent, aut ut Tacitus loqui amat *agris ingemiscunt*. Iam vero multis laboribus militum corpora exhaustiri & frangi minime debere, extra omnem dubitationis aleam situm esse, nobis persuademus. Porro quoque, qui vitam pastoralem vivunt, plus temporis bellicis reb⁹ impendere possunt; & apud Ægyptios, cum pastorum numerus adeo crevisset, aliquoties ab ijs Resp. fuit sollicitata. Primos quin etiam Romanæ gentis conditores pastores fuisse, quis ignorat? Quapropter merito hanc illi præferimus, & hic etiam majores nostros sibi non defuisse, recte judicamus.

XXI. Diximus supra, non ex cicuribus tantum, sed & feris animalibus victum sibi quæsisisse majores nostros. Multum igitur fuerunt in venationibus, & testantur hoc multi scriptores, qui hæc de re aliquid literarum monumentis consignarunt. *Quoties bella non ineunt* (ante adductis Taciti verbis utor) *multum venatibus plus per ocium transigunt.* Idem de Fennisc. ult. sic scribit: *Venatus viros pariter ac fæminas alit.* Facit huc etiam *Caesar l. 6. de Bello Gallico.* *Vita omnis, inquit, in venationibus & in studiis rei militaris consistit: à parvulis durici ei ac labori student.* Nec vero modo accuratè rem ponderemus, hæc ipsa res ipsorum scopo abludit, olim enim bellicosissimas gentes venandi studio deditas fuisse ex antiquorum monumentis constat, quæ omnia jam quidem excutere supersedemus. Illud certe ab omnibus concedi solet, venandi studium esse veluti exercitium aliquod bellicum, facit etenim homines *πρὸς πόλεμον*, ac mul-

~~Et~~ mulieris præterea commodis scatet. Habetur elegantissi-
 mus hac de re apud *Xenophontem*, apem illam Atticam, l. 1.
Cyropæd. locus, quem non possum non huc apponere, ipsa
 autem Autoris Græca verba sic habent: Δια τὸ, inquit,
 δημοσίᾳ τὴ θῆρ' ἐν ὀπμιέλονται, καὶ βασιλεὺς ὥσπερ καὶ ἐν ποιέμενῳ, ἡ-
 γεμῶν αὐτοῖς ὄντι, καὶ αὐτὸς τε θηρᾶ, καὶ τῶν ἄλλων ὀπιμελεῖται, ὥπως
 αἱ θηρᾶν. Ὅτι ἀληθεστάτη δοκεῖ αὕτη ἡ μελέτη τῶν πρὸς τὸν πόλεμον
 εἶναι. Καὶ γὰρ πρὸς αἰσινδοταί ἐθίζει καὶ ψυχὴ καὶ θαλπη ἀνέχεσθαι.
 Γυμνάζει δὲ καὶ ὁδοὺ πορείαι καὶ δρόμους. Ανάγκη δὲ τοξεύσαι θηρῶν,
 καὶ ἀκοντίζειν, ὅπως αἱ ὄρεα πίπτει καὶ τὴν ψυχὴν δὲ πολλάκις ἀνάγκη
 θῆρεσθαι ἐν τῇ θήρᾳ, ὅταν τι τῶν αἰκνίμων θηρῶν αἰσθίηται. Πάειν μὲν
 γὰρ δεῖ τὸ ὁμοτε γιγνόμενον, φυλάττειν δὲ τε τὸ ὀπιφερόμενον. ὥς
 ἔ' ῥάδιον εὐρεῖν τι, ἐν τῇ θήρᾳ ἀπεσι τῶν ἐν πολέμῳ παρόντων. Cum
 his quam optime congruit *Julius Pollux præfat. l. 5. ad Com-
 modum*, qui locus an modo laudato *Xenophontis* non me-
 rito sit præferendus, haud parùm dubitò: κυνηγεσιῶν, in-
 quit ille, σοι προσηκεῖ μέλειν, ὅτι ἱεπιτηδεύμα ἡρώικόν καὶ βασιλικόν,
 καὶ πρὸς εὐστυματίαι ἅμα καὶ εὐψυχία ἀσκεῖ, καὶ ὄντι εἰρηνικῆς τε καὶ
 κατ' ἐρείας ἅμα καὶ πολεμικῆς τόλμης μελέτημα, πρὸς ἀνδρείας φέ-
 ρον, ῥωμαλεόν τε εἶναι γυμνάζει δὲ ποδάκην, καὶ ἵππικόν καὶ ἀγχιῶν
 καὶ φιλεργόν, εἰ μέλει καθαιρήσειν καὶ τὰ ἀνθιστάμενα ἀλκῇ, καὶ τὰ
 ὑποφύγοντα ἄχει καὶ τὰ διποσσῶντα ἀφ' ἵππων, καὶ συνέτα σφία,
 καὶ τὰ λαυθάνοντα ὑπονοῖα, καὶ τὰ κρυπτόμενα χερσὶν, καὶ νύκτωρ προ-
 σαγρυπνῶν καὶ μετ' ἡμέραν ὀπιπονῶν. Hinc quoque apud *Clau-
 dianum* venationis studium in *Stilicone* collaudatur.
 Non autem existimandum est, quasi solos tantum lepores,
 aut ejusmodi pavidum animal, quod etiam ad quemvis fo-
 liorum strepitum exhorrescit, venati fuerint, sed apros,
 urfos, leones & hujus generis terribilia animalia sectati
 fuerunt. Et apud *Virgilium* IV. *Æneid.* parvulus ille *Æ-
 neæ* filius *Ascanius* obivium sibi dari vult aprum, aut fulvum
 descendere monte leonem. Cum itaque tot & tanta commo-
 da se-

da se cum trahat venatio, recte majores nostros fecisse quod exercitio huic adeo multum operis impenderint, ex altis modo nobilissimorum Autorum testimonijs satis superque probatum est. Nulli autem venandi jure, aut libertate tum temporis quidem exclusi fuerunt, quod tamen ipsum hodie longe aliter, & quidem recte sese habet, quia per mille & quod excurrit annos, inter regalia, venatio numerari coepit, magnis quoque insuper incommodis, siquidem cuivis permittatur, res illa laborare videtur.

XXII. Magnam partem etiam latrocinijs victimarunt veteres nostri Germani, quod cum multis alijs barbaris, at tamen bellicosissimis gentibus commune habuerunt. *Thueyd. l. 1. Belli Pelop.* Græcos omnes etiam, ante, quam morum cultura eos mitigaret, rapto vivere solitos fuisse testatur, & referta est ejusmodi exemplis antiqua historia: de majoribus nostris *l. 6. de Bell. Gall. Caesar* hæc habet: *Apud eos, latrocinia, inquit, nullam habent infamiam, quæ extra fines cujusq. civitatis fiunt, atque juventutis exercende, desidia minuenda causa fieri prædicant.* Eutropius etiam *l. 1. de ipso Romulo* ait, cum antequam regnum constituisset, latrocinis operam dedisse, & quo de Numæ Pompilio loquitur. *Erant, inquit, Romani ante ipsum (Numam) ἀγαυὸν τινὲς, καὶ μὴ ὁσάπασι ἐγί.* An autem exercitio bellico hoc tantopere conducatur, alij melius judicabunt; nos id saltem adjicimus, eos hac in parte non æque bono ac antea medio usos fuisse.

XXIII. Verum hæc hæc hactenus de medijs illis, quibus Majores nostri ad obtinendum finem suum, bellicam scilicet potentiam, usi fuerunt pro ratione instituti nostri jam quidem sufficient. Nunc ipsa quoque instituta bellica, quod thesi decima recepimus, breviter tamen & ὡς ἐν περὶ ἐδῶ, cum aliud quid tempus non ferat, expediāmus. Vbi primo illud monendum duco, longe diversissimos diversarum

sum gentium, uti in cœteris omnibus ita hac præsertim in parte mores fuisse, alijs enim institutis bellicis usi fuerunt Persæ & Parthi, qui omnem vim bellicam in emittendis aliquot falcatorum curruum millibus, & in arcu posuerunt, quemadmodum id cœmptissimus Autor *Quintus Curtius* l. 3. testatur. Macedones alijs, qui in Phalange Macedonica robur suum collocarunt, alijs Romani, qui equitarum quam maxime confidebant, testante *Iulio Cesare in Commentariis*, & alibi passim; Alijs denique Germani nostri, quibus auctor *Tacitus* c. 6. plus roboris penes peditem erat. Ut jam nihil dicam de varijs armorum generibus, quibus & se defenderunt, & hostem petierunt varij isti populi. Videantur *Lipsius in admirando illo de militia Romana libro*, ut & *Polybius in comparat. armat. Maced.* & alij passim obviij. Et vero nullam pene in toto terrarum orbe gentem invenias, quæ peculiare suum hac in re mores non observet & sequatur. Id autem ideo præfari volumus, ne forte quis falsa opinione ductus in recensendis & examinandis majorum nostrorum institutis bellicis frustra nos occupari arbitretur.

XXIV. Antequam tamen ad ipsa instituta bellica deveniamus, non possumus non illud in Majoribus nostris reprehendere, & atro (quod ajunt) carbone notare, illos; quemadmodum aliæ cultiores fecerunt gentes, non in unum consulasse, aut foedere aliquo συμμαχικῷ conjunctos fuisse. Imo quod magis adhuc mirere, discordijs & laniationibus civilibus sese ipsi mutuo confecerunt, tantum abest ut foedera inire laborarint, aut de communi periculo propulsando cogitarint. Quo nomine sibi & Romanis suis cum primis gratulatur *Cornelius Noster Tacitus* c. 34. de M. G. his verbis: *Maneat queso duresque gentibus (Germanicis) inquit, si non amor nostri, at certe odium sui; quando urgentibus imperijs suis nihil jam præstare fortuna majus potest, quam hostium*
discor-

discordiam & l. 12. Annál. hæc habet: Nihil adversus validis-
simas, ait, gentes istas pro nobis utilius, quam quod in commune
non consulant. Rarus duabús tribusve civitatibus ad propulsandum
commune periculum conveniunt, hinc dum singuli pugnant, uni-
versi vincuntur. Plura ejusmodi in medium afferri possent;
sed cum historia passim hunc perversum & barbarum ma-
jorum nostrorum morem tangat, operam potius lude-
re videar, siquidem plura commemorando longior siem.
Tantum autem discordia potest, qua juxta illud Micipsæ
dictum: etiam magnæ res dilabuntur. Probe id ipsum olim
secum reputarunt duo isti Græcorum πολικώτατοι, insensis-
simi alias hostes, Themistocles & Aristides, qui quanvis
alias maximo alter in alterum odio ferretur tamen ut Po-
lyænus l. 1. dicit. Διτέλειπεν πάντα τὸν πόλεμον ὁμοιοῦντες, ἡ δὲ
τῶν στρατηγῶν ὁμόνοια μάλιστα δὴ πάντας τὰς βαρβάρους ἐνίκησε.
Apud Thucyd. gravissimum sane scriptorem l. 4. hæc ha-
bentur: τὰς ἀλλοφύλους ἐπιλόντας αἰθέροι ἦν συμφροῦνται αἰμυ-
νόμεθα, εἴπερ καὶ καθ' ἑκάστης βλαπτόμενοι ζῦμπαντες κινδυνεύο-
μεν. Quocirca quam male hac in re majores nostri egerint,
& quam minus sibi caverint, credo vel oculis videbit lip-
pus inunctis. Erant scilicet Germani nostri utpote strenui
& bellicosi, ipsis etiam Romanis terrarum omnium do-
minis terrori ac formidini, quod cum alij tum Tacitus
ipse diferte testatur c. 37. de M. G. ubi in hæc verba tandem
erumpit. Non Samnis, inquit, non Pœni, non Hispania, Gallie, ve,
ne Parthi quidem sapius admonere, quippe regno Arsacis acri-
or est Getmanorum libertas. Ad quem locum in diss. de Vr-
bibus thesi 43. sic scribitur: Majora profecto dicturus, si fra-
ctas imperij Romani vires Germanicis manibus conspexisset. Et
certe florentibus Romani Imperij rebus, nullus fuit popu-
lus magis Martius, aut ad bella natus, nec qui tantum ne-
gocij crearet tot gentium victoribus Romanis, quam ipsi

hi majores nostri, quod ipsi quoque Romani fateri non erubescunt. Id profecto cuius certum esse debet, antiquam illam Germanorū virtutem Romanis non tantum parem, sed & superiorem esse potuisse, siquidem unanimi omnium consensu, aut bella sibi illata propulsassent, aut ipsi intulissent.

XXV. Sed in viam redimus, & in quonam potissimum suum robur bellicum collocarint, aut situm esse putarint majores nostri, inquirimus. Inter alios id suggerit Nobis Autor c. 6. de M. G. *Unum universum*, ait, *estimanti plus penes pedites, n. roboris, & c. 30.* ubi Cattorum instituta enarrat: *Omne robur, inquit, in pedite, quem super arma feramentis quoque & copiis coonerant.* Ex quibus duobus locis intelligimus, quam maxime eos in peditatu vim reposuisse. Quam prudenter autem id ipsum fecerint, hinc conjectura capitur, quod pedites in bellis multo minori sumptu possint ali quam equites, etiam ratione locorum, peditis major usus sit quam equitis, si forte per aspera montium, aut fruticeta iter sit capiendum, adde quod in oppugnationibus urbium aut castellorum, nullus plane equitis usus sit. Non autem soli tantum pedites pugnarunt, sed in proelijs equitibus jungebantur, *eoque mixtissime*, verba sunt Taciti nostri, *proeliabantur: apta & congruente ad equestrem pugnam velocitate peditum, quos ex omni juventute delectos, ante aciem collocant.* Ad stipulatur ijs Iulius Cæsar l. 1. de B. G. *Erant, inquit, equitum millia sex, toridem numero pedites, velocissimi ac fortissimi, quos ex omni copia singuli singulos, sua salutis causa delegerant, cum his in præliis versabantur, ad hos se equites recipiebant, hi si quid erat durius concurrebant, si qui graviore vulnere accepto, equo deciderant circumfissebant, si quo erat longius prodeundum aut celerius recipiendum, tanta erat horum exercitatione celeritas, ut iubeis equorum suble-*

vati cursum adaequarent. Hac autem re Romanorum aciem valde turbarunt, adeoque hoc pacto multoties victoriam reportarunt; & Ariovistus Germanorum Rex, ut ipse Cæsar testis est, hoc aliquando modo Romanorum exercitus graviter afflixit. In campis quoque Pharsalicis, ubi Cæsar Pompejum tandem devicit, equitatus Germanorum qui à Cæsareis stabat partibus, ita proeliatu est, & novo hoc anteaque Pompejanis minime viso instituto ordinem ipsorum perrupit, unde mox secuta victoria est, quam Cæsar nulli alij, quam equitatui, quem ex Germanis fortissimum collegerat, acceptam defert. Fuerunt autem pedites illi non ex quibusvis, sed ex omni juventute selecti, & quidem illi, qui quam maxime & præ reliquis, & corporis robore, & pedum velocitate pollerent. Hunc autem pugnandi morem apud nullam aliam gentem fuisse receptam legimus, suam tamen laude non carere judicamus.

XXVI. *Aciem porro per cuneas, ut Auctor vult, composuerunt.* Acei autem instruendæ varios esse modos docent Autores qui de hac rescripserunt, inter quos *Veget. l. 3. de militia Romana, & Aelianus tacticon. cap. 18.* egregie hanc rem persecuti sunt. Dicit autem Auctor ille Scythas & Thracas quam maxime hac figura usos fuisse. *Cunei formis, inquit, ut videntur Scythæ & Thraces, ut sunt etiam Macedones, introducente eas Philippo. Antumabat enim hos usum habere Quadratis efficacior, quod undiq. duces circumpositi sint, cumq. frons brevior fiat, equitationem etiam huc illuc facilem, & per quodvis intervallum reddere; ad hæc & reversionem & conversionem compendiosam, quod difficiles non habeant circumductiones, quemadmodum Quadrata.* Hæc ille: laudatur etiam cuneus, ab hujus rei peritis, eo, quod aciei hostili perfringendæ & turbando ordini sit aptissimus. Hinc illam aciei

E 2

for-

formam merito reliquis anteferimus, & majores nostros hanc sibi recte elegisse, statuimus.

XXVII. Nec loco quidem cedere, turpe fuit habitum, *sed dummodo rursus insles, consilij quam formidinis*, ut autor ait, *arbitrari sunt*. Hoc tamen ipsum *l. c. Annal.* Germanicus Cæsar in ijs vituperat, & *sine pudore flagitij sine cura Ducum, abire fugere dicit*. Dubio autem procul hac de causa præcipue id fecerunt, si quando iniquo fortassis loco contra vero hostibus opportuno pugnarent, aut res in id discriminis esset abducta, ut ad extrema descendere cogerentur. Porro etiam non tam ex desperatione quam eo consilio fecerunt, ut simulata hæc fuga in insidias & sylvas hostem abducerent, & ita faciliiori victoria potirentur, in sylvis autem & palustribus locis majores nostros, quorum exercitus quam maxime ex peditatu constabat, semper vicisse exercitum Romanorum ipse Germanicus Cæsar l. d. fatetur: nam fundi Germanos acie & justis locis ait, juvari sylvis, paludibus, brevi ætate & præmatura hyeme. Et Pyrrhus Epirotarum Rex hostem fugientem negat pertinaciter persequendum, ne aut desperationem vertat in virtutem, aut in insidias hostem pertrahat. Istac olim arte Cyrus Scythas, Scythæ Cyrum superarunt, ut *Herodoti. Clio* testatur, Romanorum exercitum sub jugum misit Iugurtha, uti *Romana primus in historia Crispus Sallust.* autor est. Et scæpius apud Tacitum fuga simulata locum fraudi quaesitum fuisse, intelligimus, multum enim ad victoriam momenti locus asserre potest, quod omnes inuniversum historiæ testantur *Veget. l. 3. cap. 31.* Summos præterea & fortissimos belli Duces interdum hoc modo hosti celsisse fatendum est. Et sane scutum illud Romanæ rei Quinti Fab. Maximus, cui etiam exinde Cunctatoris nomen quaesitum constat, invictas hac pacto Annibal

balis vires attrivit quemadmodum *Claud. l. 4. Honor. hisce*
versibus cecinit:

Primus fulmineum lento luctamine Parvum

Compressit Fabius.

Hoc autem consilio Majores nostros interdum cessisse pos-
tea tamen occasione data fortiter rursus instixisse nobis
persvaderi facili negotio patimur.

XXII. Etiam illud in disciplina militari præceptum
est, ne interfectorum corpora sepulturæ honore careant,
& apud *Curt. l. 5. c. 3. Rex Alexander dimittere milites in sepul-*
tos erubescerebat, ita traditio more, ut vix ullum militiarum so-
lenne esset munus, quam humandi suas. Hinc apud Home-
rum in Iliade legimus aliquot dierum inducias fuisse fa-
ctas, hac duntaxat fini, ut eo commodius sepulturæ tradi
possent occisorum corpora. Magni autem semper habita
fuit demortuorum sepultura, ita apud *Herodotum l. 1. A-*
riion Dithyrambi inventor (si rament ea historia est) cum
eum nauta in aquam vellent præcipitare, rogavit potius
ὅς πορ θύεας ἢ αὐτὸν μὲν Μαχρότατος ὡς αὐτὰ φῆς ἐν τῇ 7ῃ πύλῃ.
Et apud veteres Romanos ut & Græcos gentiles, antequam
Christianæ religioni nomen suum darent, nefas erat, in-
ventum aliquem defunctum & sepulturæ honore caren-
tem præterire, nisi injecto terpulvere, quemadmodum il-
lud notissimum est. Certo enim ijs persuasum erat, ani-
mas insepultorum circa Strygiam paludem errabundas
volitare, nec admitti ad quietem, donec humatū esset ca-
daver ut habent Poetæ. Majorum nostrorum tanta fuit
gloriæ cupido, ut etiam in dubijs proelijs corpora suorum
referrent, & debito honore afficerent, noluerunt enim ea
hosti relinquere, & legimus quam sæpissime acerrime pū-
gnatum fuisse de cadaveribus. Qua re mirum in mo-
dum fiduciam in suis augebant, eosque animæ prodigos

faciebant, nemo enim vitæ suæ parcendum putabat, cum adeo honorifice eorum cadavera haberentur, nec canibus aut avibus rapacibus, quod fieri nonnunquam consuevit, dilaceranda relinquerentur. Hinc unicus ille Trojanorum murus Hector jam morti vicinus Achillem *Uliad. l. X.* sic alloquitur:

Λίσσομι' ὑπὲρ ψυχῆς, καὶ γένων, σῶντε τοκῆων
μή μιν εἰς παρὰ νηυσὶ κύνας καταδάψαι Ἀχαιῶν
ἢ ἅλ' αὖ σὺ μὲν χαλκόντες ἄλκις χερσὸν τε δέδεξο
Δῶρα, τῆτοι δῶσθαι πατὴρ καὶ πότνια μήτηρ
Σῶμα δὲ οἴκαδ' ἱμὸν δόμεναι πάλιν, ὅφρα πυρρὸς μὲν
Τρώες καὶ Τρώων ἄλοχοι λελάχῃσι θανόντα.

Tanta scilicet æstimata fuit sepulchi jactura, quod in hominum etiamnum militia, non tamen ex hac superstitione, à qua Christianorum animus plane est alienus, observatur.

XXIX. In delinquentes porro severe animadvertunt Majores nostri: Ita teste Autore nostro; *scutum reliquisse præcipuum erat flagitium, nec aus sacris adesse, aus concilium inire, ignominioso fas, multiq. superstites bellorum infamiam laqueo finierunt.* Nullo autem prorsus pacto hæc elui macula potuit, quod profecto, utut interdum satis durum fuerit, ex re tamen Reip. Germanicæ potentiam bellicam unice pro scopò habentis, quam maxime erat. Nullibi enim majorem disciplinæ quam in militia, rationem recte haberi, statuendum est. Qui enim aliter tantus ferocissimorum hominum numerus in officio contineri possit, nullus video. Et hac ratione ignavos & imbelles tantum Reip. inutiles arboribus suspenderunt Germani veteres; præmiis enim & pœnis omnem humanam societatem regi, recte olim statuit Solon. Arma autem abjicere apud omnes gentes bellicosas semper probrosum fuit habitum

bitum, quod in historijs non plane hospiti satis superque
constat. Debet enim miles uti Diodor. Siculus l. 13. ait: τὴν πα-
ρονίαν καὶ τὴν ψυχὴν ἐν ἴσῳ ποιεῖν. Memoratu profecto di-
gnum est, quod Iustinus l. 34. c. 2. de Catois filio exemplum
refert: qui dum procerū quendam petis, gladius eiē manu elapsus,
in mediā hostium cohortem decidit, ad quem recuperandum cum
umbone se protegens, inspectante utroq; exercitu, inter micrones
se se hostium immersis recollectoq; gladio, multis vulnerebus acce-
ptis ad socios cum clamore hostium revertitur. Tanta gladij cu-
ra erat. Quare autem apud Majores nostros præcipuum
flagitium fuerit, scutum abjecisse, nonnulli præsertim Græ-
ci solent hanc rationem adducere, quod scilicet scutum de-
fendat militem, gladius vero aut hasta, vel frama (quæ majorum
nostrorum propria erat) offendat hostem, & porro debeat esse sui
corporis quam hostis cura, ideo frameam abjecisse adeo tur-
pe esse. Plutarchus in libro de argute dictis memorat: quod
Damaratus Rex Spartanorum interrogatus, cur scutum ab-
jecisse apud Spartanos adeo turpe esset, regefferit; locum
militem ipsum defendere scutum autem propter ordinem totius
exercitus sive phalangis esse servandum. Poterant enim ita in
prælio scuta compingere ut veluti tectum essent in acie
totius exercitus, & uno scuto perrupto, aut abjecto pate-
bat via catapulis. Verum breviores hic data opera eri-
mus. quo nobilior quæstio decidenda se nunc oggerit.

XXX. *Duces* (inquit Autor noster) ex virtute sumunt,
qui exemplo potius quam imperio, si prompti, si conspicui ante
aciem agant, admiratione præsumt. Cæterum neq; animadvertere,
neq; vincere neq; verberare quidem nisi Sacerdotibus permissum,
non quasi in penam, nec Ducis jussu, sed velut Deo imperante, quem
adesse bellantibus credunt. Primo hic monendum est, per vo-
cabulum Ducis antiqua Romana & vera vocis significa-
tione nihil aliud jam denotari, quam summum aliquem rei
bellicæ

bellicæ præfectum, quem nos hodie vulgo *Genêral*
appellamus. Postea tamen, præsertim Carolino ævo ali-
ter hoc vocabulum usurpari cœpit uti præclare Nobilissi-
mus Dn. Præses in *disp. de Ducibus & Comitibus* ex veterum mo-
numentis annotavit. Maximam autem præfecto laudem
mihi promeriti videntur Majores nostri, quod in Electio-
ne Ducum, virtutem potius, quam generis nobilitatem at-
tenderint, quamvis enim ad auctoritatem ejusmodi Ducis
conciliandam non minimum faciat generis nobilitas, uti
idex Sallustio novimus: nobiles enim & natalium splen-
dore præcedentes, minus nobili utut virtute prædito Du-
ci ægre obtemperant, tamen si quando utrumq; conjungi
non potest, majorem virtutis quam nobilitatis respectum
haberi debere, nullus dubito: observarunt id etiam quam
plurimæ aliæ bellicis rebus addictæ gentes. Hactenus itaq;
bene fecisse majores nostros, inde constat, an autem hoc
æque bene consultum fuerit, quod tam exiguis limitibus i-
storum belli Ducum potestatem incluserint, id vero jam
nobis erit inquirendum. Quatuor autem potissimum, sci-
entiam scilicet militarem, fortitudinem, auctoritatem, ac
deniq; felicitatem, in omni egressu belli Duce requiri, di-
sertissimus Romuli Nepotum *Marcus Cicero in Orat. pro Lege*
Mamil. ait: Inter maxima igitur requisita, etiam auctoritas à
Tullio nostro recenseri meretur, unde statim manifesto ap-
paret, quam necessaria sit hæc ipsa ad impetrandum finem
bellicum: nec desunt exempla passim in historijs, quæ ne-
glectam Ducum auctoritatem maximatum & funestissima-
rum cladum causas exstitisse prodant, unicum modo ex
historia Græcæ nunc afferemus, Athenienses ad Ægos Po-
tamos à Laconum exercitu nulla alia re magis devicti fue-
runt, quam quod insuper habita Ducum auctoritate, hinc
inde dispersi prædatum exissent. Putarunt autem majores
nostri

nostri, tempore potissimum Taciti, quo pro fortuna & rerum successu sublimiores animos gerebant, altiusque quidam & indomitū spirabant, id sua libertate minime dignū videri, si ita uni se regendos permitterent. Iulio Cæsare in Gallijs adhuc agente, longe alia, siquidem ipsi fidem arbitramur, fuit hujus rei ratio, nam ut illerefert, tempore quo bella ingruiebant, electos fuisse magistratus, qui rei summæ præessent, cum plenaria vitæ ac necis potestate. Postea itaque fortunæ & bellorum successu libertas Germanica mirum quantum crevit. Nimiam autem & pene effrœnem majorum nostrorum libertatem aut ut rectius loquor, licentiam, nemo credo laudabit, æque enim hæc Rebusp, ac nimia servitus nocet. Et longe sane rectius fecisse Romanos, qui absolutam omnium rerum potestatem Ducibus prudentibus commiserunt, statuimus; in militia enim nisi severa adhibeantur remedia, omnia sursum deorsum vertuntur, id autem neglectâ Ducum autoritate fieri certissimum est. Hinc quoque non immerito vapulant moderni Poloni, & à Prudentiōribus maximeque cordatis viris exagitantur, quod scilicet ea, qua debebant, disciplina usi non sint; quam adeo laxam disciplinam omnis illorum fortunæ & calamitatum, cum quibus nunc colluctantur, causam accersunt: sed hæc obiter. Ea autem majorum nostrorum religio aut superstitio fuit, ut, cum Ducibus suis minime sese regendos permitterent, à sacerdotibus, Dei quasi nutu (ita decepta credidit simplicitas) se & vinciri & verberari paterentur.

Tantum Religio potuit suadere malorum

Hinc non immerito *Aristot. l. 6. Pol.* ubi de tyrannide disserit, hoc etiam tyranno præceptum suggerit, ut religionem, quamvis nullam aut habeat, aut curet, tamen simullet: Ἐνδὲ τὰ θεῶν τὰς ἡνὸς φαίνεσθαι αἰὲ παρὰ δόξῃ διαφερόν-

τως, ἥτις πὶ γὰρ φοβῶνται τὸ παθεῖν το παρὰ γαμον, διὰ τῶν τοιούτων
ἐὰν δεσποδαίμονα νομίζουσιν εἶναι τὸν ἄρχοντα, καὶ φροντίζον τῶν θεῶν.
καὶ ἐπιβλέουσιν ἥτις, ὡς συμμάχους ἔχοντες θεός. Hunc igitur
maiorum nostrorum morem utpote inconsultum &
reip. perquam noxium non sine causa damnamus, & è be-
ata Rep. proscribimus.

XXXI. Audivimus supra ex Tacito, Duces Germa-
norum exemplo potius quam imperio præfuisse, non i-
gitur tantum consilijs sed etiam manu res suas adjuvarunt.
Solet autem quæstio hæc à nonnullis agitari, an scilicet
Imperator teneatur in congressu proelii, gladium stringe-
re, an vero officio suo satis defunctus videri queat, si qui-
dem bona duntaxat consilia suggerat. Possunt autem
in utramque partem probabilia afferri. Et si quidem No-
bilissimorum belli Ducum exempla intueamur, plerosque
etiam manus censeruisse in proelijs videmus. Testantur
id ipsum scriptores de Epaminondâ, Alexandro M. Pyrrho,
Alcibiade, Iulio Cæsare, Scanderbejo & innumeris alijs.
Hinc Alexander M. apud *Curium*, sic milites alloquitur l. 4.
c. 14: *nec postulare se, ait, ut fortiter caperent proelium, nisi
ipse cæteris fortitudinis fuisset exemplum, se ante prima signa
dimicaturum spondere, pro se quot cicatrices, tot corporis deco-
ra. Et apud Marinum Barletium qui Scanderbeij res gestas
egregie descripsit, ipse Heros Scanderb. sic inquit: In
saestrensi cura & labore, in militari officio, in excubijs, in vigili-
is nunquam vobis inferior eram, sed tanquam unus ex commili-
tationibus me habebam, & facta mea non dicta sequi volebam, nec
disciplinam modo sed exemplum à me peti. Nullum unquam
laborem, nullum discrimen aut periculum recusabam, si ve aliqua
simulatione aut tergiversatione fugiebam. Ex his utique ali-
quis sibi persuadere poterat, recte facere Imperatorem,
seu summum aliquem belli Ducem, quod manu etiam u-
tatur*

tatur, quia illud testantibus passim historicis ad ardorem pugnandi milites mirum in modum accendit. Contra vero cum à salute unius Imperatoris interdū imo sæpissime totius exercitus salus dependeat, & eò interfecto militum animi non parum frangantur, profecto quam maximā potest industria, salutis suæ consulere Imperatorem merito debere, statuimus, quod facere minus poterit, si quidem ipse ante aciem manu rem gerat. *Iulius Capitolinus in Maximin:* Imperatorem uti manu & ferro barbaricam esse ait temeritatem c. xii: *Habuit, inquit, hoc barbara temeritatis, ut putaret Imperatorem manu etiam sua semper uti debere.* Cum juxta Tacit. l. 12. *Annal. c. 6. plura asspiciis & consiliis quam velis & manu gerantur.* Accedit insuper, quod in proelijs quam maximè Imperatores primo petantur ab hostibus, quia illis sublati faciliorem & minus cruentam suis victoriam pollicentur. Non etiam tantum militum animos frangi, contra vero hostium attolli, sed integræ nonnunquam socitatis res concidisse, ex historicorum scriptis apparet. Novimus enim, quid acciderit Thebanis, post obitum Epaminondæ, fortissimi Herois. Videantur Iani Gebhardi doctissimi πολιμῳγата ad Neptis Cornelij Epaminondam spicilegia, ubi plura ejusmodi exempla ex Scriptoribus tam Græcis quam Latinis laudantur. Et vero Scipio Africanus optimus alias Imperator, cum ei tanquam probum objectum esset quod gladium non stringeret, hostem ipse non feriret, respondit: *mater me Imperatorem non militem genuit.* Quibus verbis, Prudentissimus Vir indicare voluit, non requiri hoc ab Imperatore, sed tantum ut bona consilia suggerendo exercitui suo proſit, cum juxta ante laudata Taciti verba res consilio potius quam manu geratur. Porro quoque ad ejusmodi consilia non nisi bene præparatum pectus re-

quiri, certum esse debet, oportet enim Imperatorem omnia diligentius circumspicere, & summo studio id cum primis præcavere, ne aut exercitus ipse aliquid detrimenti capiat, sed potius huic aut illi ingruenti malo medela quærat; in singula etiam rerum momenta intentum esse decet, nec id tantummodo ante prælium sed & in ipso congressu, animo ipsius obversetur, quomodo hostiles impetus quam optime eludere, & illorum consilij insidias tendere queat; quæ tamen omnia, certe maxima, an ab ejusmodi turbato, qualem pugnantis esse constat, animo expectari possint, merito utique dubium suboriri poterat. Quapropter siquidem nostro judicio res esset decidenda, Ducem consilio potius quam manu rem agere debere judicaremus, utpote cum ijs quæ antea feculimus, incommodis, rectius mederi vix queat.

XXXII. Iam illud merito omnibus laudibus erit efferendum, quod Autor noster ulterius in institutis bellicis Germanorum vererum notat, cum ita ait: *Quodque præcipuum fortitudinis incitamentum est, non casus, nec fortuita conglobatio turmam aut cuneum facit sed familia & propinquitates, & in proximo pignora, unde faminarum ululatus audiri unde vagitus infantrum potest; hi cuiq; sanctissimi testes, hi maximi laudatores.* Quod profecto institutum apud nullam aliam gentem usu receptum fuisse, temere quis leget. Mos etiam ille apud ipsos Germanos hodie plane exspiravit, quippe qui mercenario ut plurimum milite nunc utuntur. In Helvetiâ tamen adhuc hodieque simile quid viget, quod inde factum, quia hi ipsi non perinde ac reliqui Germani mercenario milite utuntur. Quin autem institutum illud summis sit laudibus deprædicandum, nullus equidem ambigo. Hoc enim effecit, ut alter alteri minus esset ignotus, adeoque libentius, (quod propinquitas

quitas equidem exigebat) in periculis se mutuo adjuva-
rent, quod in hodiernâ militiâ quam maximè solet de-
siderari; quia alter alterum non novit, unde fit ut sui ipsi-
us tantum quilibet curam habeat, reliquorum vero salu-
tem parum ad se pertinere putet. Porro etiam ipso Ta-
cito teste, institutum illud præcipuum fortitudinis inci-
tamentum fuit, nemo enim propinquis & amicis præsentibus
non strenue mori præoptabit, quâ igyaviæ & imbelliæ
(ut Gelliano verbo utar) maculam subire. Fuere etiam, ut
paullo ante audivimus, *in proximo pignora, unde feminarum
ululatus audiri unde vagitus infantum potuit.* Fœminæ igitur
& liberi castra secuti fuerunt. Testatur idem Cæsar
l. i. d. B. G. *Mulieres, inquit, in prælium proficiscentes, mili-
tes passis crinibus flentes implorabant, ne se in servitutem Ro-
manis traderent.* Apud Romanos & Græcos nihil unquam
tale obtinuisse legimus. Duces quidem & summi mili-
tiæ præfecti circumduxerunt secum uxores suas, & cir-
cumductæ fuerunt nobilissimæ fœminæ, ut Livia & A-
grippina, quæ dictæ fuerunt matres castrorum, verum græ-
gario militi ejusmodi quid non fuit permissum. Poterunt au-
tem & pro hoc instituto & contra id ipsum quædam in me-
dium afferri, siquidem precium operæ foret; nos tantum
breviter hic quid nobis videatur, proponemus. Primum
itaque hoc esto, quod scilicet, siquidem miles sit uxora-
tus, & prohibeatur eam in castris secum circumducere,
vinculum illud matrimonij admodum debilitetur, quod
non potest non cum magno Reip. detrimento esse conjun-
ctum. Quid olim acciderit Lacedæmonijs foris militan-
tibus, notius est, quàm ut hic recenseri mereatur. Hoc
etiam nomine hæud parum nocet; quod miles ab uxore
sua remotus, & in ocio degens, omnis generis peccatis,

adulterio scilicet, sese contaminet nec debitam rerum
Inarum curam habere possit, quod longe aliter fieret, si-
quidem uxorem secum haberet. Ad id porro prodest, fœ-
minas castra sequi, ut eo rectius liberi in exercitijs & studijs
bellicis educantur, adeoque proelijs & pugnis paulatim assue-
scant, qui postea adulti pro fortissimis & optimis solent
haberi. Sin contra fiat & illi apud matrès domi delite-
scant, periculum erit, ne fiant imbelles & ignavi, quod
summo studio bellicis rebus addictæ genti præcavendum
est. Adde, quod ipsos etiam milites reddat fortiores &
ad capeffendum proelium promptiores, cum pro aris &
focis tum sibi decertandum esse videant, nemo enim libe-
ros & conjugem suam temere in hostium manus deveni-
re patietur. *Memoriae proditum est, (verba sunt Auctoris)*
quasdam acies inclinatas jam & labentes à fœminis restitutas
constantia precum & objectu pectorum & monstrata cominus ca-
pititate, quam longe impatientius fœminarum suarum nomine
riment. Non absimile huic exemplum apud *Justin. l. 1. de*
Mulieribus Persicis legimus. Narrat Romanæ historiæ
scriptor *Lucius Florus l. 3. c. 3. de Cimbrorum mulieribus,*
quod scilicet Romanis, *non minor cum uxoribus eorum pu-*
gna quam cum ipsis (Viris) fuerit, quum objectis undique plau-
stris, atq. carpentis, de super & quasi è turribus lanceis contisque
pugnarent. Attende hoc, quisquis es, & cui sententiæ cal-
culum tuum adicere debeas, recte considera. Hoc ta-
men exceptum volumus, si quando annonæ caritas inten-
sa fuerit, recte mulieres castris arceri, quod tum minori
commeatu exercitui sit opus.

XXXII. Illud non possum non hic cum primis et-
iam recensere quod *Autor noster c. 39. de Svevis & cap. 43.*
de Arijs dicit, quæcum ad mores & instituta bellica per-
tineant,

tineant, omittere nefas habemus. De Svevis hæc habet. *Apud Svevos, inquit, usq. ad canitiem, horrentem capillum retro sequuntur, ac sæpe in ipso solo vertice religant, principes & ornatiorem habent. Ea cura formæ sed innoxia, neq. eum ut ament, amenturve, in altitudinem quandam ac terrorem adituri bella, compit ut hostium oculis ornantur.* Ita quoque in ante audato *Philippi Cluver. lib.* depinguntur, qua fini id fecerint, diserte addit Tacitus, ut hosti hoc modo terrorem incuterent. An autem hæc capillorum cultura illud effecerit, non dubito, multum enim illam Germanicam staturam, quæ satis aliàs procera erat, adjuvit, quo pacto multo terribiliores hosti ipsi fuerunt. Illud autem, quod *cap. 43. de Arijs* recenset, melius est: *Cæterum Arii, ait, supra vires, quibus enumeratos paullo ante Germania populos antecedunt, truces, insite feritati arte ac tempore lenocinantur. Nigra scuta, tincta corpora, atras ad proelia noctes legunt; ipsaque formidino atque umbra feralis exercitus, terrorem inferunt, nullo hostium sustinente novum ac velut infernum aspectum, nam primi in omnibus proeliis oculi vincuntur.* Medicato scilicet fuco aliquo, aut etiam, quod nonnulli historici afferunt, cruore, faciem ante congressum procliorum pinxerunt, ut eo terribiliores hostibus viderentur, cum nihil prius ac oculi in proelijs vincantur. Illud etiam, cum olim probe nosset summus ille bellorum, in castris Alexandri, Dux Parmenio, Alexandrum monet, ut potius nocte ex improvviso Persas adoriatur: *Interdiu enim terribiles occursum facies Scytharum, Bactrianorumq. hirta illis ora, & intonsas comas esse. Præterea eximiam vastorum magnitudinem corporum, vanis & inanibus militem magis, quam justis formidinis causis moveri.* Apud omnes autem Germanos illud in usu minime fuisse, ex historijs antiquis satis potest elici.

XXXIV. Finem exercitio huic nostro imponemus, modo paucis hunc morem examinaverimus an scilicet illud ex usu Reip. fuerit, quod ita semper armati etiam ipso pacis tempore, incesserint Majores nostri. Siquidem enim Tacito nostro fides habetur, *nihil neque publica neque privata rei egerunt, nisi armati etiam ad ipsa convivia armati processerunt.* Quem morem adhuc hodie retinuerunt Helvetij, & in Hispania quoque ad hoc usque tempus idem mos observatur, quod incolæ regionis istius procul dubio à Gothis populis Germaniæ acceperunt. Apud Romanos longe aliter sese hæc res habebat, tempore enim pacis, ne sicam quidem gestare licebat, & si qui cum sica reperiretur, in eum severe animadvertebat Prætor Romanus. Novimus autem utramque gentem victoriam & gloriam bello partam pro scopo habuisse, nec iisdem tamen moribus hac in re usas fuisse. Quamvis autem nonnulli hic afferant, gestationem hanc præcipue ad id conducere, ut ipso etiam pacis tempore, & tranquillatis undique rebus, eo melius quis de bello cogitare, & in studio Martis occupari queat, quod non potest non illi evenire, qui quotidie armis accinctus est. Facere etiam præterea, ad tutelam corporis, ut eo tutior aliquis sit ab insidijs & hostilibus insultibus; hæc tamen tanti ponderis mihi non videntur esse, ut inde armorum gestatio pacis tempore patrocinium inveniatur. Insidias enim & hostiles insultus pacis tempore in bene constituta Rep. merui non debere, nec adeo armis tum opus esse, siquidem arma gestare nulli sit permissum arbitramur. Et quantumvis hæc omnia largiamur, majora tamen exinde incommoda promanare sic asserimus, quia armorum gestatio vinolentos cum primis & ebrietati de-

ditos

ditos (quales Majores nostros fuisse ante ex Tacito probavimus) nimis reddit feroces, & ad injuriam pronos, hinc multæ cædes & homicidia ortum trahunt. Quantum autem hoc ipsum detrimenti Reip. afferat, nemo non intelligit. Adde his etiam, quod in Monarchijs aut tyrannicis Rebus publ. nemini armorum tractatio hæc concedi debeat. Observavit hoc etiam cum primis Autor noster de Sutionibus Imperio regio subjectis c. 13. quando. Ità loquitur: *Nec arma, ut apud ceteros Germanos in promiscuo, sed clausa sub custode, & quidem seruo, quia subitis hostium incursum prohibet Oceanus, ociosa porro armatorum manus facile lasciviant.* Enimvero neque nobilem neque libertum armis præponere, regia utilitas est. Ejusmodi itaque Rebus, quanta pestis veniat promiscua armorum gestatio, hinc cogitur. Quapropter merito ita concludimus, quandoquidem majora & plura secum incommoda hic Germanorum mos trahit, ideoque merito Romanorum instituto, hæc quidem in parte palmam deferimus. Et hæc quidem hætenus pro ingenij modulo, de Majorum nostrorum scopo, & medijs ad eum impetrandum facientibus, deq; ipsis institutis bellicis, si non omnibus certe præcipuis, & ad ductum Taciti pauca, & *et cetera* exhibuimus, cui etiam nostro conatui ut omnes boni favcant, unice in votis habemus, hæc summa, (ut ille ait) votorum, summa curarum. Constitueramus quidem de veterum Germanorum armis, quædam ex alijs autoribus adjicere, deque eorum ad Remp. usu differere, sed partim injuria temporis exclusi, partim quoniam passim hac de re libri offerantur, & unus instar omnium merito omnibus esse possit, Philippus Cluvius, antiquitatis ille Germanicæ Phoenix, cujus scrinia compilare, & quæ egregia habet, culpa ingeni

geni deterere, religionem puto, merito itaque hoc labore
superfedeo. Sit igitur SOLI DEO
GLORIA.

COROLLARIA.

I.

Liberrima testamenti factio, ut Rebusp.
herilibus prodest, sic civilibus quam maxime
obest.

II.

Majores nostros indigenas fuisse, Taciti ar-
gumenta, quæ affert, non evincunt.

III.

Inviti etiam, modo digni, ad capeffendos
magistratus, siquidem nolint, recte cogi pos-
se, statuimus.

IV.

Parricidium Anglicanum, & Iuri divino &
humano adversatur, adeoque nullo modo ex-
cusationem meretur.

V.

Majores nostri, utut Barbari, in plerisque,
quæ scopum ipsorum concernunt, Remp.
suam